

四庫全書

史部

欽定四庫全書

唐大詔令集卷五十六

宋 宋敏求 編

大臣

宰相

罷免下

李鄜戶部尚書制

王涯兵部尚書制

崔羣湖南觀察使制

令狐楚宣歙池觀察使制

蕭俛右僕射制

崔植刑部尚書制

元稹同州刺史制

裴度右僕射制

宋申錫太子右庶子制

陳夷行左僕射制

杜棕右僕射崔鉉戶部尚書制

鄭朗太子少師制

鄭畋太子少傅分司東都制

裴盾鄂岳觀察使制

崔盾吏部尚書制

裴樞崔遠左右僕射制

罷免下

李鄴戶部尚書制

夫為君者求舊以申其用施恕以遂其情為臣者陳力以効其能奉身以明其志故在上則終始之道備居下則進退之義全茲惟休哉用厚恩禮銀青光祿大夫守門下侍郎同中書門下平章事上柱國江夏縣開國侯食邑一千戶李鄴居潔履方端明審固有沉毅莊重之質有堅剛迅敏之心勁節夙表於屯夷利器久彰於中外朕庶跡其衆善詢及庶工登之台階授以政柄將欲藉其碩德弘厥壯猷而固辭之誠再疏頗切然猶未允其

請所冀式副予懷迨此旬時勞於夙夜益願頤養堅稱
哀遲宜罷樞軸之殷俾居喉舌之重就閑高秩式示優

崇可守戶部尚書

元和十三年三月

王涯兵部尚書制

股肱之任與國同體苟或取容於位啓沃無聞將何以
寅亮天工弘宣德化朕嗣膺丕業爰任鈞衡知善必昇
見否而退茲所以推至公於天下也銀青光祿大夫守
中書侍郎同中書門下平章事上柱國清源縣開國男

王涯素以藝文早登華貫參我宥密再處內庭位踐公
台拔於非次誠宜匪躬峻節納誨盡忠而乃因循自持
譙默無補期於進道屢復星霜空勞虛懷未副明獎雖
夙夜之勤久著而具瞻之望何從君臣之大義存終始
宜解職於樞務俾副曹於夏官尚謂優崇勉敬斯任可
行尚書兵部侍郎

元和十三年八月

崔羣湖南觀察使制

致君之道爰在輔臣發輝政經端理教化其或彝倫未

叙公議不明免其所職我常典也正議大夫守中書侍郎
同中書門下平章事上柱國賜紫金魚袋崔羣根於溫
敬發以詞采踐歷臺閣潤色絲綸嘗以敏才列於宥密
考能觀行益表謙勤擢處鈞衡用參大政緝熙之績每
竭其謀猷翊贊之心亦彰於夙夜旰食思理注於話言
善而可行無不虛受而顧問之際謂近於至公詳聽之
間或違於事實將何以同底于道化洽萬方宜罷印於
中樞俾報政於外服優以顯秩爾其勉之可持節都督

潭州諸軍事潭州刺史兼御史大夫湖南都團練觀察

處置等使勳賜如故

元和十四年十一月

令孤楚宣歙池觀察使制

朕聞為政以德必推誠而任人為君以道必存體以立國況乎位崇元輔職總庶寮衆方具瞻時以輕重得不明進退之禮全始終之恩大中大夫守門下侍郎同中書門下平章事上輕車都尉賜紫金魚袋令孤楚夙擅懿文累階清貫先朝特加寵命獎擢內庭出擁旌旄入

居鼎鉉朕祗膺寶位注意舊臣方屬奉陵之時委以復
土之務是宜竭心盡慮使下不欺而頗聞工徒之訴累
彰官吏之罪遽有章表固求退閒宜歸相印之權往授
使符之命仍兼榮於司憲俾奉法以惠人勉率乃心表
予洪覆可使持節宣州諸軍事宣州刺史兼御史大夫
宣歙池等州都團練觀察處置使勲賜如故

元和十五年七月

蕭俛右僕射制

師長庶工總詳六職重任久曠益難其人自非體參股

肱位列鈞鼎能引義以知退爰致禮而加恩則授受之間何以允茲任也朝議大夫守門下侍郎同中書門下平章事徐國公賜紫金魚袋蕭俛門承華袞位列清貫用能周物志在匡時勤內署之論思肅南臺之綱紀朕自承大序擢處台階推一心獻納之誠贊四方經營之績及此踰歲累誠懇辭微恙所侵堅請難奪朕憂勤庶政親委大臣務厚始終以全進退既謝弼諧之任宜加端揆之崇爾其戒之服我優秩可守尚書右僕射勲賜

如故長慶元
年正月

崔植刑部尚書制

門下宰相者朕之腹心和合天下在乎鎮靜藩服附親
遠方將弘遂物之宜必有更張之道正議大夫守中書
侍郎同中書門下平章事武騎尉賜紫金魚袋崔植往
在先朝頗推廣直馴行惟謹保萬石之風清德不渝繼
四公之業遂昇左掖實著能名駁正之美稱於朝列朕
以孝公太傅代載忠貞擢於相門授以台席顧惟寡昧

奉以丕圖每念為君之難敢忘從諫之義推誠聽納虛
已諮詢庶洽羣心以迎和氣叔教是期於秉羽汲黯謂
致於寢謀宵分以興日旰忘食昔藩國多事平津讓侯
陰陽未和石慶辭位爾惟謙遜豈常求安稱疾拜章勤亦
至矣雖愒日之年未及而寢冰之意尚堅遂輟樞機用
成美志崇以天秩長於秋官君臣之間朕無所愧可守
刑部尚書散官勲賜如故

長慶三年二月

元稹同州刺史制

宰相者位列巖廊權參造化內操政柄上代天工朕嗣
守丕圖思與至治每於擢用冀獲雋良為善有聞必資
獎寵惟於愆謗用罷台階通議大夫守尚書工部侍郎
同中書門下平章事上柱國賜紫金魚袋元稹游藝資
身明經筮仕累膺科選益振榮華茂識宏才登名晁董
之列佳辭麗句馳聲謝鮑之間頃在憲臺嘗推舉職比
及遷黜亦以直聞是以擢在周行典斯誥命洎參處密近旋委
台衡宜竭謀猷盡以匡贊而乃不思弘益之道遂纓註

誤之愆察以衷情雖非為已行茲左道豈曰効忠體涉
異端理宜偕罷朕以君臣之分貴獲始終任使之時亦
獻誠懇每思加膝寧忍墜泉猶弘在宥之心俾列專城
之寄左郡之大三輔推雄控壓關河連屬宮苑勉於政績
副我優恩可使持節同州諸軍事守同州刺史充本州
防禦使長春宮等使散官勲賜如故

長慶二
年六月

裴度右僕射制

朕端已推誠資於輔相求人與衆諒在訏謨所以詢公

卿之言從士庶之望輟任淮海俾居台階舉先朝勳舊
之臣當四海具瞻之位推心委柄期在賢能成效靡孚
余將何望守司空兼門下侍郎同中書門下平章事上
柱國晉國公食邑三千戶裴度器本端誠道惟謇諤挺
筠松之操蘊珪玉之姿望著巖廊功書竹帛策勲報爵
寵極人臣朕恭守睿圖推心弼輔聿求俊彥思致雍熙
擢升論道之司再授樞衡之任虛心日矢佇乃嘉猷而
鼎飪未調弛張異制誠宜有犯無隱忠謹必陳使余誠

懷不惑聞聽何容違於造次致有間於笙簧棘木既窮
匪辭焉驗昔漢以陰陽不和冊免丞相今爾訐謨或爽
宜罷台司疇勲績以尚功錄忠勞而念舊俾居右揆非
謂左遷用崇師長之榮勿以優閑自薄可守本官尚書

右僕射散官勲封如故

長慶三年六月

宋申錫太子右庶子制

君臣之道義切始終股肱之良任存正直苟涉邪枉自
紊憲章既虧恪慎之心難委弼諧之任正議大夫行尚

書右丞同中書門下平章事上柱國賜紫金魚袋宋申
錫學習儒門職參翰苑備我顧問洽茲寵光謂其啓沃
竭忠擢登台鉉而乃踐修不慎日底愆尤知臣之規俾
予增愧欲過姦回之路宜先勸懲之源豈可猶秉樞機
仍司考轄罷居台席列位龍樓誠謂寬恩周全至體朕
以事狀之間慮其寃濫鞫驗之際洎務詳明當竚得情
以復申明可行太子右庶子散官勲封如故

太和五年三月

陳夷行左僕射制

王者推至公以御天下成庶務以佚羣才況乎寅亮所
資安危攸屬顧是進退實惟矜慎其有績懋致君誠深
知止則豈可不優其恩禮遂以便安上德尊賢於是乎
在銀青光祿大夫守尚書左僕射兼門下侍郎同中書
門下平章事監修國史陳夷行受天正性味道至和雅
量川渟厚德山峙慮必經遠詞皆摭微舒遲見君子之
容端肅得大臣之體文推訓誥學奧泉源膏腴五常枝
葉百行早以精懿列侍禁闈溫樹既彰於不言王度每

資於密贊洎踐登衮職左右文宗遇事必陳犯鱗靡懼
標揭令範振揚直聲逮余纂承再諧夢卜輔我以大中
之道弘我以可久之規匡益居多厥庸甚茂近者寒暑
乖候步履或難雖嘉猷屢竭於沃心微恙有妨於造膝
朕雖倚賴方樂優崇而獻疏披誠固懷退讓眷言美志
難議強煩用是輟燮贊於三台專儀刑於百揆庶可資
乎頤養且無替其宗高仍加貴勲式表光寵可守尚書

左僕射仍賜上柱國

會昌二年六月

杜棕右僕射崔鉉戶部尚書制

君之任臣也進則用其才勞則逸其事况丹青大化佐
佑朕躬謨明之效已彰歲月之勤亦至俾其宴息用保
初終尚書右僕射兼門下侍郎同中書門下平章事杜
棕貞莊有容沉厚多敏早歷內外之任備陳經濟之謀
剛厲馳聲肅恭推美通議大夫守中書侍郎兼戶部尚
書同中書門下平章事充集賢殿大學士上柱國博陵
縣開國子食邑五百戶賜紫金魚袋崔鉉誠明挺操溫

粹含章擢自禁垣之中列於台司之上獻替不倦沉研
益光而皆披袞在廷事君弘道方當注意資爾令猷或
趨尚之間時聞朋比黜陟之際迹涉依違朕尊禮大臣
虛襟庶政將務義唐之化所期伊呂之賢苟曰未諧豈
副僉屬臨軒永念能不憮然宜解職三台列官八座長
揆天臺之右地居戶版之雄勉思令圖服我成命悰可
行尚書右僕射鉉可守戶部尚書

會昌五年四月

鄭朗太子少師制

相輔之臣賢傑是膺苟或道茂台階功宣時柄洪化方
深於倚注微疴遽告其退休宜降寵私俾安頤攝庶得
君臣之義實全終始之恩通議大夫守中書侍郎兼禮
部尚書同中書門下平章事監修國史上柱國賜紫金
魚袋鄭朗靈鳳耀儀非熊表德貞厚可以鎮風俗謙恭
可以和神人量合澄波氣凝金璞論議必根於王化文
章雅叶於國經起於卑察積乃重望自周旋臺閣總領
藩方故事書著於典章仁聲藹流於謠詠頃司邦計國

用以殷逮領憲闡朝綱載肅泊乎克符夢卜遂委鈞衡
理庶政而百度惟貞調元氣而三光增耀而又勤獻納
稍失節宣屢陳謝病之辭待舉優賢之命是用釋茲機
務允乃至誠爾其專一精神補助藥石將圖有間務在
無營往參六傅之榮仍加貳令之職用為羽翼爰輟股
肱嘉猷永播於事公深睠豈忘於興寢慎爾多福祇膺
恩寵可檢校尚書右僕射兼太子少師

大中十一年十月

鄭畋太子少傅分司東都制

門下將相之權安危所係注專戎律秉持國鈞謂成靖
亂之謀以著匡時之績方期功就俄以疾辭仍乖撫字
之方且異毗予之道尚居崇秩猶念初心諸軍四面行
營都統鳳翔隴等州節度觀察處置等使開府儀同三
司守司空兼門下侍郎同中書門下平章事鳳翔尹上
柱國滎陽縣開國子食邑二千戶鄭畋藝高冊府譽動
詞林禮樂在躬衣簪奕代虹玉動連城之價朱絃含清
廟之音才無不周識無不綜踐歷既久聞望時稱禁林

傳麗藻之工鳳沼著經綸之業洎凶徒犯順上國罹災
駕當出於全蜀鎮方臨於右輔因時建策遂首興師上
寬焦灼之懷下慰蒸黎之望念其竭節頻降殊恩任三
事之優崇書面之節制許於除授皆俾遵行則朕於施
功之臣可謂無有愛惜而不能傾心養士盡力惜人致
興半菽之嗟竟起多寒之怨既乖撫馭幾誤機權賴仗
義之徒叶心王事舉善暗符於朕意推姦必違於勲庸
尚保傳於承華仍優游於東洛未妨頤養猶示渥恩凡

百庶寮宜體朕意可太子少師分司東都散官勳封如
故仍且於興元管內 便將養候疾損日赴任主者施
行

裴盾鄂岳觀察使制

原闕

特進行門下侍郎兼兵部尚書同中書門下平章事監
修國史上柱國裴盾秀挺華宗光膺積慶高懸天爵煥

發人文早著令名亟昇清貫自超翔宥密演暢綸言因
成魚水之歡遂委棟梁之任張子房之借筋遽展謨猷
謝安石之圍碁將明氣度繫乃之力毗予化源旋屬寇
犯京師駕惟巡省益表忠貞之節備彰患難之時冒白
刃以脫身激丹誠而報國安危所注中外具瞻道方被
於匡周功已參於微管每寬宵旰用慰憂勤既在輿言
當存國體爰從燮贊待假優崇朕以夏口奧區武昌重
地況今萑蒲尚擾細柳猶勤全資濟物之仁式叶觀風

之政念茲鈞軸付以察廉連數郡之豐盈問兆人之疾苦
即冀烽烟弭息寰宇清寧俟侯藩重歸相印往踐乃
位可檢校兵部尚書兼御史大夫充鄂岳州觀察使散
官勲封如故主者施行

崔胤吏部尚書制

門下天地廣運寒暑所以推遷帝王任人理亂係於周
稔故叔敖三相往道堪思胡廣七為前功斯在因詳文
冊爰示徽章扶危匡國致理功臣光祿大夫守中書侍

郎兼吏部尚書同中書門下平章事判度支上柱國清
河郡開國公食邑二千戶崔胤金莖擢用玉燭資和朱
絃含理代之音蒼壁是禮天之器自付政柄累遇時艱
或已去而復還每勤官而蒞事雖矜直道終失中庸朕
昨者初復上京方安庶品且期靜理貴保和光而於敷
奏之間獨有去留之說徒妨事體俾長紛爭是用輟乃
鈞衡專茲銓鏡亦將示朝廷之典制保君臣之始終更

茂前功永孚於道可守吏部尚書

光化二年正月

裴樞崔遠左右僕射制

門下入則秉鈞衡而凝庶政出則正冠冕以長百寮式
資夙舊之臣咸謂重難之地銀青光祿大夫守尚書右僕
射兼門下侍郎同中書門下平章事充太清宮使弘文
館大學士延資庫使諸道鹽鐵轉運等使上柱國河東
郡開國侯食邑一千戶裴樞周事歷年慎守三紀再持
國柄屢竭訐謨光祿大夫門下侍郎兼兵部尚書同中
書門下平章事監修國史上柱國博陵郡開國公食邑

二千戶崔遠語默有程得喪無撓中樞薦履盡瘁克彰
俱宣夙夜之勤備罄匡扶之業是用均其勞逸顯爾便
蕃燮調暫輟於劇權師表並資於碩望無虧懿效式使
當仁或增疏爵之榮更表優賢之禮樞可光祿大夫守
尚書左僕射仍進封開國公加食邑一千戶勲如故遠
可守尚書右僕射散官勲封並如故

天祐二年三月二十五日

唐大詔令集卷五十六

欽定四庫全書

唐大詔令集卷五十七

宋 宋敏求 編

大臣

宰相

休致

盧懷慎去官養疾勅

杜佑太保致仕制

貶降上

張嘉貞幽州刺史制

杜暹荊州長史李元紘曹州刺史制

宇文融汝州刺史制

第五琦忠州長史制

第五琦長流夷州制

李揆袁州長史制

王縉括州刺史制

楊炎崖州司馬制

鄭餘慶柳州司馬制

韋執誼崖州司馬制

于頔恩王傳絕朝謁制

皇甫鏗崖州司戶參軍制

令狐楚衡州刺史制

宋申錫開州司馬制

李德裕袁州長史制

李宗閔處州刺史制

再貶李宗閔處州長史制

三貶李宗閔潮州司戶制

休致

盧懷慎去官養疾勅

勅留侯多病漢皇許其頤養呂蒙未瘳吳王因而惜戚
此則古之義也銀青光祿大夫檢校黃門監上柱國漁
陽郡開國伯盧懷慎大才宏識資忠履信學窮墳典文

緯邦國朕之倚賴人實具瞻頃者忘身徇公積勞為瘵
竭誠抗表固辭在職方欲省其謀慮專於導引且憑針
艾之術副朕鹽梅之期宜聽去官許其養病

杜佑太保致仕制

宣力濟時為臣之懿躅辭榮告老行已之高風况乎任
重公台義深翼贊秉冲讓之志堅金石之誠敦諭既勤
堅執彌固則當遂其忠懇進以宗名尚齒優賢斯王化
之本也金紫光祿大夫守司徒同中書門下平章事兼

崇文館大學士充太清宮使上柱國岐國公食邑三千
戶杜佑巖廊上材邦國茂器蘊經通之識體溫厚之姿
寬裕本乎性情謨猷彰乎事業博聞強學知歷代沿革
之宜為政惠人審羣黎利病之要由是再司邦用累歷
藩方出總戎麾入和鼎實聿膺重寄歷事先朝左右朕
躬夙夜不懈命以詔冊登之上台肅恭在廷華髮承弁
茲可謂國之元老人之具瞻者也朕纘承丕業思弘景
化選勞求舊期致時雍方申引翼之儀遽抗懸車之請

而又固辭年病乞就休閒已而復來星館屢變有不可
抑良用耿然永惟古先哲王君臣之際臣有耆艾以求
其退君有優賜以徇其情乃輟鄧禹敷教之功仍增王
祥輔導之秩俾養浩然之氣安於敬止之鄉庶頤神保
和永綏福履仍加階級以厚寵章其惟敬哉茲謂全致
光祿大夫守太保致仕宜朝朔望

貶降上

張嘉貞幽州刺史制

中書令張嘉貞備位宰官夙承恩命不能勵其公節以訓私門其弟嘉祐頃緣獎愛遷在清秩憑寵自肆蹟貨有彰豈可仍踐台階儀刑百辟貶居藩守俾肅朝倫可幽州刺史

杜暹荊州長史李元紘曹州刺史制

出納王言發揮綸翰宰臣之任選衆推賢檢校黃門侍郎同中書門下平章杜暹同中書門下平章事李元紘等咸勵忠勤用登樞揆雖清以自收而道則未宏不能同心戮力以祇帝載而乃肆懷相短以玷朝綸朕緣事醜股肱情惟隱蔽掩其累

而不率遂其過彌彰將何以緝敘三光儀刑官辟宜回
中禁俾列專城遲可荊州長史元紘可曹州刺史

宇文融汝州刺史制

事君之節在於匪躬為臣則忠期於無隱黃門侍郎同
中書門下平章事宇文融幸借藝能俾承推薦往以封
輯田戶漕運邊儲用其籌謀頗有弘益三遷憲府再入
禮闈仍仗以訏謨委其密勿雖十旬八拜一日九遷方
此超騰彼未為速庶違爾弼久則停於昌言諫而不臧近頗

彰於公論交游非謹舉薦或虧將何以論道三台具瞻
百辟宜輟中樞之位居外藩之寄可汝州刺史

第五琦忠州長史制

台庭之位陶甄是屬在和羹而或爽當折足而貽憂由
是舜舉二臣叶心者俾又漢闕三相無能者同免苟虧
公議抑有彝章正議大夫行尚書戶部侍郎同中書門
下平章事權知門下省事上柱國扶風縣男賜紫金魚
袋第五琦夙表材幹累遷要途久專司於國賦常有利

於公家往自艱難備經任使以獎其效拔在鈞衡此事
每涉私政非近體率情變法且違行古之方封已怙權
稍闕在公之義薄國靡費聚斂尤繁既罔上而取容亦
害下而恣怨凡所進拔悉收瑕釁又與賀蘭進明並居
權要潛結往來嘗夜會於私第歸必淹於永漏殊乖憲
典足表異端頗招黨比之嫌甚失弼諧之望稽諸故事
合議刑章但以任在股肱理無按問遂抑情於含匿斯
以禮而始終豈可更踐台階尚塵樞禁宜申遠謫之命

俾肅懲違之典可忠州長史員外置同正員外官勲封

如故

乾元二年十一月

第五琦長流夷州制

君之使臣期叶心以輔政臣之事主當盡忠以明職苟或冒官罔上黷利宗姦靡懲折鼎之凶載履覆車之轍自貽厚責難捨刑章正議大夫行忠州長史員外置同正員外上柱國扶風縣男第五琦素以幹能早膺任使自艱難之際帑藏是司久彰歲月之勞頗申強濟之用

所以收其課績擢在台階而行閱由哀任性過量務容
身之計虧許國之誠變法多紊於常經率情每違於直
道交惟黨比用非忠良頗乖秉鈞之體諒之致君之志
頃者遂從貶削爰示典章是以輿議日聞僭違益露引
承福於肘腋殖貨於中處朱敏於膏腴竊貨於外懷金
暗室曾不慚於四知納賄私家動有踰於萬計比令按
問咸伏其辜且國賦邦徭軍儲歲備朕以戎車屢駕屯
俗未康常有戒勅令其節省豈謂陰圖聚斂擅出科條

上延謗於公家下益疲於人業徇私封已歸怨稱君忝
曰人臣胡寧忍此况又深尤隱慝累干刑書朕亦含垢
匿瑕為之掩惡議以明刑合從秋令顧君臣之義庶
始終而禮全夫除惡務本國家之彝訓申恩念舊王者
之深仁屬陽和在辰品物咸遂由是抑從寬典特屈嚴
誅宜寬殊死之命俾就投荒之謫可除名長流夷州馳
驛發遣朕差綱領送至彼所勿許東西於戲朕臨御以
來每更輔弼皆宥以過失存其祿位今者琦之所犯負

國誠深義不可以苟容法不可以頻貸申茲憲令用警

庶察凡百卿士宜知朕意

乾元三年二月

李揆袁州長史制

持衡當軸體備股肱若鼎餗之不知慮鼓妖之有釁台
司稍紊王度則乖宜峻藝章以懲不道銀青光祿大夫
行中書侍郎同中書門下平章事集賢殿崇文館大學
士兼修國史上柱國姑臧縣開國伯本以藝文累階資序周
旋近密參掌絲綸庶其翼亮之勤列在訏謨之地任惟

過力誠匪奉公無聞憂國之心不懼曠官之責具瞻何
取進退求容陰懷罔上之謀更漏省中之語端居相府
潛構禍胎動河南之八州昧廟堂之三寶將圖不軌振擾方
隅考驗甚明發姦斯在私乘駟傳自越章程式按秋官
合從徽纒但以任叨宰輔久侍堦墀特寬丹筆之書猶
左朱幡之職俾從遠默以肅朝倫可袁州長史員外置
同正員仍即馳驛赴任

王縉括州刺史制

門下侍郎中書門下平章事王縉附會姦邪阿炎讒諂
據茲犯狀罪至難捨矜以耄及未忍加誅俾申屈法之
恩貸以岳牧之秩可使持節括州諸軍事括州刺史宜
即赴任於戲朕恭己南面推誠股肱敷求哲人將弼予
理昧於任使過在朕躬無曠厥官各慎爾職

楊炎崖州司馬制

尚書左僕射楊炎託以文藝累登清貫雖謫居荒服而
虛稱猶在朕初臨萬邦思弘大化務擢非次招納時髦

拔自郡佐登於台鼎獨委心膂信任無疑而乃不思竭誠敢為姦蠹進邪醜正既偽且妄黨援因依動涉情故墮法敗度罔上行私苟利其身不顧於國加以內無訓誡外有交通縱恣詐欺以成賊賄詢其事跡本末乖謬淺恩棄德負我何深考秋議刑罪在難宥但以朕於將相義切始終顧全大體特有宏貸俾從遠謫以肅具寮可崖州司馬員外置同正員仍即馳驛發遣

鄭餘慶柳州司馬制

輔弼之臣百辟是憲苟二其行則黷大猷守中書門下
平章事鄭餘慶頃謂忠貞擢居台輔仍乖正直有涉比
周棄法弄情公行黨比苟徇邪志頗紊彝倫謫佐遐藩
以懲不恪朕擢於不次誠冀効忠乃自速辜亦所難逭
凡百君子宜悉朕懷可彬州司馬置同正員

韋執誼崖州司馬制

為臣之道必在盡忠其有朋黨比周挾邪敗度事資懲
戒必正典刑正議大夫中書侍郎同中書門下平章事

崇文館大學士修國史賜紫金魚袋韋執誼幸以藝文
久從任使早居禁署謬列鼎台直諒無聞姦回有素負
恩棄德毀信廢忠言必矯誣動皆蒙蔽官由黨進政以
賄成朕初臨萬邦務於弘大每存容恕冀有悛心而乃
不顧憲章敢行欺罔宜投荒服以儆無良以曾事先朝
嘗參近職尚寬極法俾佐遐藩可崖州司馬員外置同
正員仍即馳驛發遣

于頔恩王傳絕朝謁制

君之使臣也有以極崇寵之恩臣之事君也是宜懷感
勵之志然後上下交應始終可觀道德齊禮之風行遷
善遠罪之功著寓縣之內歡然太和其或誘勸無施僻
違自縱干我邦紀黷於彝倫羣情所非物聽增駭雖欲
覆護厥路何由尚復裁於朕心特示宏貸俯從屈法用
表曲全非予敢私誠謂遠體金紫光祿大夫守司空同
中書門下平章事充太微宮使上柱國燕國公于頔軒
裳之族頗習藝文累踐臺郎丞分符守特稱器幹遂領

藩方爰自先朝持節襄漢率情肆暴敗法作威蔑易典
章公違詔旨事皆顯白僉論不容朕以臨御之初務修
德化政豈尚於至察道姑務於包荒由是大推衷誠排
絕衆議賜以聯恩之寵增其相位之榮禮命所加焜耀
當代洎秉圭來覲和調台鼎任兼論道之司位冠群臣
之列閨門子弟紆章紱於周行命秩車輿極紛華於里
巷雖動藏盟府行滿縉紳德澤優深曾未階比而罔戒
盈覆猶務希求廣出貨財潛信卜射且又縱其勇敏專

殺私庭害及平人慘深支解京轂之下凶毒若茲聞之
震驚增用悼痛慮其曖昧按驗皆明家道則然蒐慝斯
在自懼禁網宜峻刑書猶以嘗厚恩親未忍置之嚴憲
遂申寬宥俾傅王門服於靜專庶能循省可行恩王傅
散官勲封如故仍絕朝謁於戲朕惟漢宣之理在於信
賞必罰而伯宗有言亦責匿瑕含垢豈化之未至將善
或難躋孤我初心良增愧歎凡百多士宜悉朕懷

皇甫鏞崖州司戶參軍制

朕顧眇身初膺大寶思有以上諧天意下悅人心將澄
理化之源必分邪正之路言念輔弼方俟忠賢其或挾
姦容身歛怨歸國罪已暴於天下法宜行於事初不速
去之曷明予志中大夫守門下侍郎同中書門下平章
事上柱國賜紫金魚袋皇甫鏞器本凡近性惟險狹行
靡所顧文無可觀雖早踐朝倫而素乖公望自掌邦計
屬當軍興以剝下為徇公既鼓衆怒以矯跡為孤立用
塞人言洎塵台司益蠹時政不知經國之大體不慮安

邊之遠圖三軍多凍餒之憂百姓深凋瘵之弊事皆罔
蔽言悉虛誣遠近咸知朝野同怨而又廣稱方事上惑
先朝潛通姦人罪在難捨合加竄殛以正刑章俾黜遐
荒尚存寬典凡百在位宜悉朕懷

令狐楚衡州刺史制

元稹

忠臣之節莫大於送往事居君子之方寧忘於養廉遠
耻况位隆輔相職奉園陵蒙蔽之過屢聞誠敬之心盡
廢朕雖含垢人亦有言深念君臣之恩難厭公卿之論

宣歙等州都團練觀察處置等使大中大夫使持節宣
州諸軍事守宣州刺史兼御史大夫上柱國輕車都尉
賜紫金魚袋令狐楚早以文藝得踐班資憲宗念才擢
居榮近異端斯害獨見不明密隳討伐之謀潛附竒邪
之黨因緣得地進取多門遂參台階實妨賢路朕以道
尊無改事貴有終再命黃扉之榮專奉玄宮之禮而不
能率下罔念匡君致于隳政牧之職掩韋術李鄴之舉
成朕不敏職汝之由前命乘輅尚期改節人心大惑物

議沸然雖欲特容難排衆怒俾從謫守猶奉詔條予豈
無恩爾且自省可使持節衡州諸軍事守衡州刺史散
官勲賜如故仍馳驛發遣

宋申錫開州司馬制

勅正議大夫新授太子右庶子上柱國賜紫金魚袋宋
申錫頃由藝文擢居近密謂能潔已可以佐時遂越常
資超升大任自參樞務驟易寒暄嘉謀茂聞醜迹斯露
致茲獄訴實駭朝聽俾窮根本亦對嗣稱以左驗之間

有所漏網正刑之際始示寬恩於戲朕自君臨推誠宰
輔常務仁恕以保和平豈意魚水之期翻貽吳越之慮
撫事興歎中宵耿然是用重難親臨鞠問及諸耆德徧
於名卿庶其盡忠頗為審克屈茲藝憲俾佐遐藩凡百
具察宜知朕意

李德裕袁州長史制

有國之典本於明罰為君之道必在去邪皇王大政諒
無易此姦宄與偕誠敬盡虧無君之心因事輒見豈可

尚居崇秩猶列東朝銀青光祿大夫守太子賓客分司
東都上柱國贊皇縣開國伯食邑七百戶李德裕性本
陰狡才則脆弱因緣薄藝頡頏清途既忝藩鎮旋處鈞
軸靡懷愧畏肆意欺誣廢撓舊章汨亂彝序賢良盡逐
當白晝而重關詭詐是謀逮中宵而萬變朕嘗以寒暑
得疾初甚驚人凡百臣子奔走道路而德裕私室宴然
全無憂戚王涯駐車道左絡繹追呼滿朝傾駭竟以不
至又在西蜀之日徵逋縣錢僅三十萬貫使疲羸老弱

徒轉溝壑交結異類任用儉人賄賂流行朱紫無辨是
宜處之重典以正刑書猶以夙經委使載深寬宥俾佐
遐服用示寬恩可守袁州長史馳驛發遣

李宗閔明州刺史制

夫輔宰之任緝熙庶工苟或政紊彝倫跡涉黨比則何
以執是邦柄毗予一人銀青光祿大夫守中書侍郎同
中書門下平章事上柱國襄武縣開國侯食邑一千戶
李宗閔頃以詞藝列於班行乃藉宗枝驟升顯貫朕嗣

膺大寶夢想勤勞謂其忠厚小心再委樞務每必造膝而問虛已以求將欲俾人不迷致我垂衣而理付之鈞軸斷然不疑而乃事每懷私言非納誨近者別登俊彥與之同列忌賢不悅物論誼譁翼贊之効蔑聞怨嫌之聲屢作前後叨位中外同辭惟進奔競之徒莫修恭慎之道蔽我卑聽擅我化權不思急召之恩都忘再擢之寵況且志無報主舉非正人顧其操心乃是速戾則何以式是百辟以維四方尚從屈法之典俾守遐藩之牧

所謂全體良愧知臣可明州刺史仍馳驛赴任

再貶李宗閔處州長史制

明州刺史李宗閔股肱之臣付以大政所宜竭節以答殊榮事或負予法所難貸雖欲終始其可得乎且細大之罪既暴前詔而交通匪類蹤跡又彰豈可尚領方州牧我黎庶宜謫遐佐以肅朝倫可處州長史馳驛發遣

三貶李宗閔潮州司戶制

交結凶邪叨取榮顯姦險陰慝因事盡彰頃為吏部侍

郎令沈議於內人宋若憲處密求宰相及事蹤敗露文字猶在閱視之際良深歎駭既專樞柄益附私黨附下周上廢義滅公言多矯誣動挾欺詐傷風敗政負我何深按之刑章法在無赦尚以早經任使賜以全生投之裔夷實我恩貸嗚呼知人則哲朕方自咎為臣苟進當鑒於斯百爾君子宜體予意

唐大詔令集卷五十七

欽定四庫全書

唐大詔令集卷五十八

宋 宋敏求 編

大臣

宰相

貶降下

李德裕潮州司馬制

李德裕崖州司戶制

李回太子賓客分司東都制

李回賀州刺史制

楊收端州司馬制

楊收長流驩州制

孔緯荊州節度使制

張濬鄂岳觀察使制

杜讓能梧州刺史制

孫偓南州司馬制

朱朴彬州司戶制

王搏工部侍郎制

王搏溪州刺史制

王搏崖州司戶制

崔胤工部尚書制

裴樞登州刺史崔遠萊州刺史制

陸辰濮州司戶王搏淄州司戶制

裴贇青州司戶制

卷五十一
柳璨密州司戶制

貶降下

李德裕潮州司馬制

勅錄其自効則付以國權懲彼保姦則舉茲朝憲此王者所以本人情而張法理也特進行太子少保分司東都上柱國衛國公食邑三千戶李德裕憑藉鉉基累承台衮不能盡心奉國竭節匡君事必徇情政多任已愛憎頗乖於公道昇黜或在於私門遂使冤塞之徒日聞

騰口積嫌之下得以恣心豈可尚居保傅之榮猶列清
宗之地宜加竄斥以戒僻違嗚呼朕臨御萬方推誠庶
物顧彼纖瑣皆欲保安豈於將相舊臣獨遺恩顧而羣
議不息謗書盈篋爰舉典章事非獲已凡百寮庶宜體
朕懷可潮州司馬員外置同正員仍所在馳驛

李德裕崖州司戶制

勅朕祇荷丕業思平泰階將分邪正之流冀使華夷胥
悅其有嘗登元輔久奉武宗深包禍心盜弄國柄雖行

謹斥之典未塞億兆之言是用再舉朝章式遵彝憲守
潮州司馬員外置同正員李德裕早藉門地叨踐清華
累膺將相之榮惟以姦傾為業當會昌之際極公台之
榮騁諛佞而得君情遂專恣而持國政怙權生事妬賢
害忠動多詭異之謀潛懷僭越之志秉直者必棄嚮善
者盡排誣貞良造朋黨之名肆讒構生加誅之釁奸有
踰於指鹿罪實見於欺天頃者方處鈞衡曾無嫌避委
國史於愛婚之手寵秘文於弱子之身洎參命書亦引

親昵恭惟元和實錄乃不刊之書擅敢改張罔有畏忌
奪他人之懿績為私門之令猷又附會李紳之曲情斷
成吳相之冤獄凡彼簪纓之士過其進取之途驕倨自
誇狡猾無對擢爾之髮數罪未窮再窺罔上之由益駭
無君之意使天下之士重足而跡皆懾懼奉爾而慢易在
公為臣至此於法何追於戲朕務全物體久為含宏雖
黜降其官榮尚蓋藏其醜狀而睥睨未已兢惕無聞積
惡既彰公議難抑是宜移投荒服以謝萬方中外臣寮

當鑒予旨可崖州司戶參軍員外置同正員仍仰所在
馳驛發遣縱逢恩赦不在量移之限

大中二年九月

李回太子賓客分司東都制

勅王者懸賞罰以示萬方况乎臣子若奮其良術則宜
擢處重任或挾彼邪謀固合稍加懲沮惟此二柄我何
敢私湖南都團練觀察處置等使光祿大夫行潭州刺
史兼御史大夫上柱國隴西郡開國公食邑二千戶李
回早以藝學科名累登華貫謂爾奉公約已旋升大寮

因緣獎遷遂陟台輔而不能竭誠以盡忠益枉道而求
庇交通財賄導達姦邪昨因推鞠兇徒皆得發明事跡
朕務弘體裁特免研窮論既喧騰理須移奪况又聞頃
司政柄每欲除授咸取決於德裕不自行其至公物議
所興以斯為重豈可猶委澄清之任復領湘潭是宜輟
從調護之班俾分洛邑爾其勉蒞寵秩幸予寬恩可行

太子賓客分司東都

大中二年九月

李回賀州刺史制

勅為臣竭公忠之誠朝尊爵賞事君乖毗倚之望國有
典章惟此二道理所不廢湖南都團練觀察處置等使
光祿大夫行潭州刺史兼御史大夫上柱國隴西郡開
國公食邑二千戶李回始以才術升於台階作予股肱
亦援星律寄長兼於授鉞道甚異於匪躬亦既左遷俾
居廉問而跡乖檢慎事露端倪秉鈞之勢已移枉道之
蹤乃見負我非淺叨榮故深況又聞頃司政柄應欲授
除咸取決於德裕不自行其至公人亦有言孽亦何道

朕匿瑕含垢思全進退之宜爾則同力協心且易樞機
之任合歸嚴謹猶示寬恩故前制命爾為太子賓客給
事中封還我勅且曰責坐之詞至重降移之秩太輕物
論喧然以為未當爾實自構予何敢私是用移謫臨賀
冀厭羣議勉於三省勿謂無恩可持節賀州諸軍事賀
州刺史仍所在馳驛赴任

大中二年九月

楊叔端州司馬制

勅人臣之節莫重於忠良氏族所修無外於清順二者

不立何以正身況乎居常伯之崇應藩侯之寄雖顧初
終之體當明懲勸之端宣歙觀察使檢校工部尚書宣
州刺史兼御史大夫楊收始以文章選在宥密纔歷二
歲擢升台衡謂其發自寒門必有操寄行孤貞之道報
國用恭儉之禮化時夙夜勵精以酬恩遇而乃貪黷為
業溝壑難盈逞其私懷盜我名器以官常為貨利之徑
持僭侈為暴橫之資田產遍於四海臺榭擬於中禁而
又結連姦黨聽任儉人險詐千端回邪萬狀欺罔彌甚

顧慮茂聞謂日月之照臨或所隱漏意天地之姦慝可
以包容殊不知心既不悛孽無以遁去歲驗其事跡未
忍揭揚委以察廉僭咎時聞縉紳之內物議喧然班列
之中怨念未息朕以寬恕馭下仁閔為心中外臣寮悉
明此志負我既甚其法何如竄於遐馭式示嚴憲爾惟
自棄毋或尤人可守端州司馬員外置同正員仍馳驛

發遣

咸通八年八月

楊收長流驩州制

勅端州司馬楊收起自孤寒猥承委任罔思報効惟恣
姦欺心每挾邪言常近利江西置節制之額務在虛兵
浙右創造船之名便其盜用兩地推覆按驗分明豈可
尚佐專城猶居仕籍俾投荒裔用塞愆尤中外臣寮各
體朕意宜除名配驩州充長流百姓縱逢恩赦不在量
移之限仍錮身所在防押遞送至彼具到日申聞仍路

次縣給遞驢一頭并熟食

咸通十年二月

孔緯荆南節度使制

朕垂衣嚮明負屨成化內則委輔翼之任外則寄藩屏
之臣比用股肱是為心膂况荆衡巨屏禹貢右封南制
百蠻西控三蜀或膺統臨之命爰崇迭處之榮持危啟
運保乂功臣開府儀同三司守太保兼門下侍郎同中
書門下平章事國子祭酒充太清宮使弘文館大學士
延資庫使諸道鹽鐵轉運等使上柱國魯國公食邑四
千戶食實封五百戶孔緯闕里傳宗儒林植操出入累
更於華貫超升遂陟於鼎司宜成我無為歌我有截豈

可但崇朋助罕究吞藏昨者張濬首請興師親求伐叛
且陳計畫累贊征行決言旬朔之間克著殊常之效延
英互奏幾疑朕言文字繼來固違朕志以至干戈一舉
星紀將周并汾之寇孽未除蒲晉之生靈已盡構茲紛
擾職爾披陳罔思惑亂之由堅執比周之計詢於輿論
曷副旁求今則正罷中樞俾安外閫尚顧始終之念用
成進退之宜勉服明恩往祗休命可檢校太保兼御史
大夫充江陵尹荆南節度觀察等使

大順二年正月

張濟鄂岳觀察使制

昔漢武因恭儉富庶之後建置朔方孫弘沮之十不得
一良史以弘有宰相之體誠以愛人治國為先拓境開
邊為末及孝宣帝值雄才削平之餘將議北伐魏相爭
之五將尋罷果致中興號為賢輔况朕承天厭干戈之際人
思休息之時敢望臯夔共成堯日庶幾孫魏粗及漢年
苟異於斯如何倚注光祿大夫守尚書右僕射兼中書
侍郎同中書門下平章事集賢殿大學士判度支兼京

畿諸道營田修國太廟使充河東諸道行營兵馬招討
指揮制置等使河東節度觀察處置等使上柱國河間
郡開國公食邑三千戶食實封二百戶張濬早以盛名
稱為奇士由是再加召用委以鈞衡謂其必致小康克
勝大任而乃周思守道但欲邀功是不詢之計謀起無
名之兵甲自云一舉止在旬時堅請抗論勢莫能奪輕
葛亮渭濱之役小裴度淮右之行而經歷寒暄糜費百
萬虛誕張於朝野詐詭布於華夷橫草茂聞燎原愈急

俾擁旄乘駟之使囚於虜庭致勤王奉國之師懷歸本
土忘廊廟之威重結藩屏之寇讐是使海內生靈竭於
貢賦豈獨河中郡邑蕩為丘墟生此厲階欲誰歸咎嗚
呼徵晁錯之故事仍王恢之舊章國有明文爾當何道
尚以愛人以禮治體宜然庶鎮劇權武昌善地宜罷軸
樞之任仍停度支之司勉自深惟以逃後命可檢校尚
書右僕射充鄂岳等州都團練觀察等使

大順二年正月

杜讓能梧州刺史制

輔弼之事安危所屬大則調陰陽以期昭泰次則撫夷夏以務洽平俾比屋之可封致乃后於無事兆人允賴百辟具瞻苟異於斯則將安用扶危啟運保乂功臣開府儀同三司守太尉兼門下侍郎同中書門下平章事太清宮使弘文館大學士延資庫使兼諸道鹽鐵轉運等使上柱國晉國公杜讓能軒裳貴胄禮樂清門蹈姬孔之康莊邁韋平之闕閼夙推重望早歷華資洎陟台司亟更年籥方謂偉儒克承大任而乃首居帷幄輕議

干戈棄卿士之臧謀搆藩垣之深釁啟詢之際證執彌
堅果致兵集甸畿人散都邑尚賴祖宗垂祐賢智叶謀
啟悟朕心別施制命詢彼與人之論咸推上相之尤須
示典章用息騰沸尚居列郡式重大臣可貶梧州刺史

景福二
年九月

孫偓南州司馬制

勅金紫光祿大夫守禮部尚書安樂郡開國侯食邑一
千戶孫偓夙通朝籍累踐華資竊顧多歧遽隳直道秉

弼諧之大政附伎術之小人罔畏公言自為良策處嫌
疑而不愧謂寵利之可安而屬我艱危匪能匡救頃因
丕變亦貸藝章雖罷萬機尚分六職是惟循省俾息沸
騰觀諫臣所上之言陳取戾不已之狀則正御之位非
爾宜居將倣後來遂授荒服行當答已無或尤人可貶
南州司馬員外置同正員仍令所在馳驛發遣

乾寧四年八月

朱朴柳州司馬制

勅夔州司馬員外置同正員朱朴本在寒微偶升科第

復塵簪組且列膠庠不為自審之謀但務夤緣之計實
因姦幸潛致顯榮亦謂術可弭兵學能治國叨半歲容
身之貴無一朝輔政之功惟辱中台頗興輿論斥於散
外未絕他腸越法制以有圖信愆尤之自作封章所指
竄逐尚輕掾彼方州亦云寬典非我好黜惟爾深思可

貶柳州司戶參軍

乾寧四年八月

王搏工部侍郎制

天地之數寒暑有推遷輔弼之臣任用有進退蓋以其

宣力斯久克修是虧俾夫退列貳卿式示朝典以禮之
道其在茲乎扶危匡國致理功臣開府儀同三司守司
空兼門下侍郎同中書門下平章事監修國史判度支
上柱國魯國公食邑三千戶食實封一百戶王搏始以
非才擢升重位亟移主律蔑効公忠惟務回邪罔思致
正奈朝廷之綱紀致經費之空虛而又朋附近臣隳張
大體豈可尚持政柄所宜降處周行猶念含弘勉為循

省可特進尚書工部侍郎

光化二年六月

王搏溪州刺史制

勅工部侍郎王搏久司邦計復掌國鈞致帑藏之不豐
則材謀而安在曾無謹正但務回邪盡非燮理之心惟
是貪婪之志今則罷其大柄復列二卿雖優弘之制已
行在問俗之司俾任可謫授溪州刺史所在馳驛發遣

光化三
年六月

王搏崖州司戶制

勅溪州刺史王搏久居重位罔著嘉猷掌邦計而罕致

豐盈顧私室而惟多貪積雖示朝黜未塞羣情俾從竹
使之權許履掾曹之職可貶崖州司戶參軍員外置同

正員

光化三年六月

崔胤工部尚書制

食君之祿合務於盡忠秉國之鈞宜思於致理其有疊
膺異渥經執重權遂萌狂悖之心忽構傾危之計人知
不可天固難容扶危定亂致理功臣開府儀同三司守
司空兼門下侍郎平章事充太清宮使弘文館大學士

延資庫使諸道鹽鐵轉運等使判度支上柱國魏國公
食邑五千戶崔胤奕葉公台蟬聯珪組冠歲多升於甲
乙壯年位列於公卿趨向有間行藏可尚朕採於羣議
詢彼輿情冀有小康遂登大任殊不知漏卮難滿器小
易盈曾無報國之心但作危邦之計四居極位一無可
稱豈有都城合聚兵甲暗養死士將亂國經聚貔虎以
保其一方致刁斗遠連於右輔始則將京兆府官錢委
元規台卒後則用度支權利令陳珙聚兵士去公朝權

歸私室百辟休戚在其顧盼之間四方是非繫彼指呼之際令狐渙姦織有素操守無堪用作腹心共張聲勢遂令濫居深密日在禁闈罔惑朕躬偽行書詔致茲播越職爾之由豈有權重位崇恩深獎厚曾無惕厲轉恣睚眦顯構外兵將圖不軌朕以士庶流散兵革繁多遂命宰臣與之商議五降內使一貢表章堅卧不來拒詔如此况又拘留庶吏廢闕晨趨人既奔驚朕須巡幸果見兵纏輦轂火照宮闈煙塵漲天干戈匝野致朕

奔迫及於岐陽翠輦未安鐵騎旋至圍逼行在焚燒屋
廬觀此阨危咎將誰執近省全忠表章兼遣幕吏敷
陳言宰臣繼飛密緘促其兵士西上靜詳構扇孰測包
藏無功及人為國生事於戲君人之道委之宰衡庶務
殷繁豈能親理盡將機務付爾主張負我何多構亂致此
仍存大體不謂無恩可謫授朝散大夫守工部尚書

天復

二年十一月

裴樞登州刺史崔遠萊州刺史制

勅朕謬將眇質叨荷丕圖常懷馭朽之心每軫泣辜之
念諒於黜陟豈易施行左僕射裴樞右僕射崔遠雖罷
機衡尚居揆路既處優崇之任未傷進退之規不能屏
志安家但恣流言謗國頗興物論難抑朝章須離八座
之榮尚付六條之政勉思答已無志尤人樞可責授朝
散大夫登州刺史遠可責授朝散大夫萊州刺史並委

御史臺催促出京所在馳驛發遣

天祐二
年五月

陸扆濮州司戶王溥淄州司戶制

勅朕以涼德獲嗣丕圖將弘至公以凝庶績憲章不濫
賞罰惟宜俾恢理政之風用振紀綱之典其有嘗居宰
輔但協姦邪苟玉石之未分則稂莠而將茂須行黜責
用致澄清吏部尚書陸宸早以文儒亟揚華顯自先皇
帝議征峻隴而宸確有救論果犯雷霆旋經遷貶其後
託茂貞之勢援憑閣監之梯媒尋復舊官再升高位惟
知周比寧務變和邇來多難罔不由此工部尚書王溥
亦茂貞與主崔胤門人驟歷禁闈俄塵衮職但恣詭隨

之志曾無匪懈之稱崔胤既寘嚴誅而溥獨居清列况
朕恭承大寶思拯彝倫非為洗垢求瑕但冀懲惡勸善
兼宜斥於外掾不容在夫中臺尚謂寬恩勉當省過宸可

濮州司戶參軍溥可淄州司戶參軍

天祐二年五月

裴贄青州司戶制

勅朕聞君臣之間進退以禮矧於耆舊欲保初終苟自
掇於悔尤亦須行於黜責特進守司空致政裴贄早以
公望嘗踐台司靡聞竭力以匡時每務養恬而避事洎

從請老不謂無恩合慎樞機動循規矩雖云勇退乃有
後言自為徒薄之魁頗失大臣之體謫居郡掾用立朝
綱尚謂過輕所宜自咎可貶青州司戶參軍


天祐二
年六月

柳璨密州司戶制

勅明罰飭法固有彝章懲惡除邪用攄衆怒責授官登
州刺史柳璨素矜儉巧每務回邪幸以庸才驟持重柄
曾無微效顯負明恩詭譎多端包藏莫測但結連於凶
險獨傾陷於賢良罪既貫盈理須竄殛尚處一麾之獨

任虧三尺之常刑將塞羣言須行重典自貽顛覆無乃
怨尤可貶密州司戶參軍

天祐二年
十二月



唐大詔令集卷五十八

欽定四庫全書

史部

唐大詔令集卷

五十九至
六十二

詳校官編修臣范來宗

編修臣裴謙覆勘

總校官編修臣倉聖脉

校對官學正臣常循

騰錄監生臣甯汝櫛

欽定四庫全書

唐大詔令集卷五十九

宋 宋敏求 編

大臣

將帥

命將

解琬朔方道後軍大總管制

王峻朔方道行軍總管制

薛訥白衣攝左羽林將軍擊吐蕃制

薛訥朔方道大總管制

郭子儀兵馬副元帥制

郭子儀東京畿山東河南諸道元帥制

李光弼副知行營事制

王思禮北京留守制

闕

郭子儀兼邠寧鄜坊兩道節度使制

闕

郭子儀都統諸道兵馬收范陽制

殘

李鼎隴右節度使制

李若幽朔方節度使賜名國貞制

郭子儀汾陽郡王知朔方行營制

僕固懷恩朔方節度使制

李抱玉河西道副元帥制

馬燧渾瑊副元帥同招討河中制

李晟鳳翔隴右節度使兼涇原副元帥制

劉洽宋亳兵馬都統制

范布朝京西行營節度使制

裴度鎮幽兩道招撫使制

裴度鎮州四面招討使制

命將

解琬朔方道後軍大總管制

蘇頌

門下鼓旗中軍是推元帥熊羆後勁亦屬武臣金紫光祿大夫行左散騎常侍上柱國濟南郡開國公解琬學窮經史才蘊韜略握兵之要克壯其猷右領軍衛大將

軍兼檢校單于大都護鎮守大使上柱國長平郡開國
公張知運久鎮邊庭備詳敵勢奪劍之勇隱如敵國並
師旅是習獯戎所憚陰陽勝負成誦在心山川向背若
指之掌寒膠已折秋草具腓宜屯細柳之營俾作蘭臯
之氣琬可充朔方道後軍大總管知運可充朔方道後
軍副大總管並准例發遣主者施行

先天二年九月二十日

王暉朔方道行軍總管制

黃門古者檢狁孔熾匈奴寔驕則設以三策雖屬備戎

之典方於五材未聞去兵之義不有行者誰能捍之正
議大夫行鴻臚少卿上柱國朔方軍副大總管王峻個
儻多智堅剛竭節每讀前史思齊古人辭家而志滅獯
戎報國而躬先將校項虞南牧城彼朔方蕭關洞開沙
漠無事既獲全軍之利則惟保塞之勞嘉其善謀必有
成績昔北逐狄者任專而決亦西護羌者功遂而調用
明分閫之重式副齊壇之期朝實僉諧爾其懋往可持
節充朔方道行軍大總管仍兼安北大都護豐安定遠

三城等軍及側近州軍宜依舊列並受暖節制其安北
都護府依於中受降城安置兵須足食理籍加屯今正
農時務及耕種并緣邊兵募亦委量事通融苟非切便
即停減總處置訖奏聞即馳驛准例發遣主者施行

元開

二年二月初五日

薛訥白衣攝左羽林將軍擊吐蕃制

勅棄瑕錄用有國通典捨罪責功先王舊式薛訥蘊韜
鈴之畧嘗文武之任委以分閫冀靜邊塵遂聞喪律實

負朝寄准其所犯合置嚴刑言念老臣寬其小過既赦

孟明之罪佇收馮異之功可隴右道防禦大使

開元二年八月

薛訥朔方道大總管制

蘇頌

黃門古之合將帥訓甲兵所以宣威武而制邊疆也自
非藥卻之裔孫吳之才何以總中軍而絕大漠矣右羽
林軍大將軍上柱國河東郡開國公涼州鎮軍大總管
薛訥家代名將國朝元老知湧泉原氣橫風厲廟堂之
上則寬而有謀旗鼓之間則勇而無撓頌者單于地隔

驕子天亡衆已離心魁未懸首弔伐大義既憑推轂逋
逃殘孽將待覆巢鎮於朔陲屬我南仲宜持節朔方行
軍大總管太僕少卿上柱國呂延祚謀慮經遠才明決
斷右威衛將軍兼靈州刺史豐安軍使上柱國杜賓客
三軍之雄萬人之敵以之入幕孰不師臧曾謂出軍肅
茲王命宜並充副大總管節度王者施行

開元三年十
月十四日

郭子儀兵馬副元帥制

制昔伊尹與湯合傳說與高宗合尚父與周公故哲后

良臣莫不至合非賢不久有開必先久大之業也公上畧
雄才博信明誼受我旄鉞輯寧區夏典器銘彝高視前
古實邦家之傑豈獨為予社稷之衛可獨弼予節制咨
謀安危斯屬懼朕之不稱也往惟欽哉司空子儀可兵
馬副元帥主者施行

至德二年
四月十日

郭子儀東京畿山東河南諸道元帥制

時屬艱難用勤師旅元帥之任必藉廟謀苟非人傑孰
久朝寄兼司徒中書令朔方節度副大使郭子儀風雲

有感星象降生秉文武之姿懷經濟之器自允狂構禍
區宇未寧蘊忠貞以立身資義勇而成務加其識度弘
遠謀慮冲深張飛乃萬人之敵卻殺是三軍之帥故能
掃清強寇收復二京建茲大勲成我王業雖少康嗣位
夏靡贊其功光武中興鄧禹集其事以今觀古未足多
之但以氛祲未清軍戎是急爰求碩德仗以貞師宜承
重委克濟多難可充東京畿及山東道并河南諸道元

帥仍權知東京留守

乾元二年
三月三日

李光弼副知行營事制

元帥之任實屬於師貞左軍之選諒資於邦傑自非道
申啟沃學貫韜鈴則何以翊分闡而專征膺鑿門而受
律求諸將相允得其人司空兼侍中薊國公光弼器識
弘遠志懷沉毅蘊孫吳之畧有文武之才往屬艱難備
彰智勇協雲雷而經始保宗社之阨危由是出備長城
入扶大厦茂功懸於日月嘉績被於巖廊屬殘寇猶虞
摠戎有命用擇惟賢之佐式弘建親之典必能輯寧邦

家協贊天人誓余丹浦之師勦彼綠林之盜載申朝獎
爰藉舊勲宜副出車之命仍踐分麾之寵仍與天下兵

馬元帥趙王係副知節度行營事

乾元二年七月

原闕

郭子儀都統諸道兵馬收范陽制

勅朕聞昆夷作患周王授鉞於方叔大宛不庭漢主委兵於廣利則知昏迷之黨舞干不足以懷柔聖哲之謀伐叛必資于用武事將禁暴蓋非獲已司徒兼中書令朔方鄜坊邠寧等節度使代國公子儀慶鍾五百運符魚水挺戈

武之宏才蘊輻鈐之遠界積蒼生之重望有命代之元勳
負鼎和羹已申於啓沃登壇制勝寶佇於謀猷萬里長城
倚賴攸屬今殘妖未殄戎事猶殷爰資一舉之功以靖四方
之難宜令子儀都統諸道兵馬使管崇嗣充副使取邠州
慶朔方路通往收大同橫野清夷便收范陽及河北仍
遣射生衙衛前六軍英武長興寧國左右威遠驍騎等
左廂一萬人馬軍三千步軍七千人以開府李光進充都
知兵馬使特進鄔崇福充都虞候右廂一萬人馬軍三

千人步軍七千人以開府儀同三司李鼎充都知兵馬使特進王晫充都虞候渭北官健一萬人馬軍三千人步軍八千人以開府辛京杲充使朔方留後蕃漢官健八千人馬軍八百步軍七千二百人以兼御史中丞任敷渾釋之同充使蕃漢部落一萬人馬軍五千步軍五千人以御史中丞慕容兆與新投降首領奴賴同統押充使鄜坊等州官健一萬人馬軍一千步軍九千人以攝御史中丞杜冕充使寧州官健一萬人馬軍一千步

軍九千人以攝御史中丞桑如珪充使涇原防禦官健
二千人馬軍五百人步軍一千五百人以大將軍閻英
奇充使蒐乘練卒籍馬賦軍合四方以齊心率九夷而
同力金鼓作氣鐵騎爭雄欲野噴山殷天動地以仗順
之師旅討從逆之兇徒人事天時指期可定今將畧高
關以出雲中驅蚊蚋於幽燕掃挽槍於鞏洛削平天下
混一車書然後獻凱清廟策勲盟府尅寧區夏豈不盛
與兵馬既衆恐路次難為供應仍備六十日程糧十馱

遣發馬畜草料所在量事支供不得妄有煩擾百姓仍
委子儀即遣人先於諸道計會分數次進發仍與回紇
兵馬倚角相應逐便討除所開軍務應須處置並委子

儀續具狀奏聞

上元元年九月

李鼎隴西節度使制

勅勇而多謀是資兼領明則益辨實仗宏才開府儀同
三司行鳳翔尹兼御史大夫充本府及秦隴興鳳成等
州節度觀察使保定郡開國公李鼎成用通明智略深

遠攻守之志不憚勤勞報効之誠無忘夙夜頃以岐陽
近甸王業大都爰藉政能委之鎮緝下車未幾克樹奇
功寇盜底寧聲誣載洽眷茲隴外戎馬要衝時屬艱虞
尤資式遏制勝千里諒在伊人必當振我師徒展茲籌
畫兼弱攻昧在此行焉可持節都督鄯州諸軍事鄯州
刺史隴右節度營田等使餘並如故

上元二年六月

李若幽朔方節度使賜名國貞制

保大定功事資於弘量坐籌決勝政總於中軍令在必

行冠不可玩欲清小醜須委大臣中大夫守殿中監賜
紫金魚袋李若幽宗室英髦士林楨幹出忠入孝抱質
懷文包果斷之深謀蘊韜鈴之秘畧累登清貫克振休
聲名正西京姦豪屏息紀綱三蜀邛楚又安庶黎賴其
強明縉紳推其利用今河洛之境未殄餘氛晉魏之郊
比仍多壘山河襟帶關輔要衝東盡太行南隣魏汭擁
旄亘野精騎成羣必俟元戎以清妖孽靜言其選允謂
當仁地官高步於六卿亞相作程於百辟綜斯劇務朝

選攸歸宜兼領護之權以副師貞之吉可戶部尚書兼御史大夫持節充朔方鎮西北庭興平陳鄭等州節度行營兵馬及河東節度都統處置使鎮于絳仍賜名國

貞上元元
年八月

郭子儀汾陽郡王知朔方行營制

命將之選當仁實難非夫文可經邦未能安人和衆武可禁暴罔以克敵成功允藉宏才爰申錫命司徒兼中書令靈州大都督府長史單于鎮副大都護持節充朔

方節度關內營田度支營田鹽池押諸蕃部落副大使
知節度六城水運使兼邠寧廊坊等道節度副大使上
柱國代國公子儀河嶽間氣巖廊重寶器量深識寬而
有謀術應通方用而無滯自經險阻實擁旌旄遂能克
復二京折衝千里厥戎將殄時乃之功久勤啓沃載竭
忠謹人所望也天實賚予今殘寇未寧興師頗廣雖鎮
守經制已有區分而籌畫指麾必資專制將軍辭第無
以家為丞相憂邊思平國難固以訐謨之命申總統之

威其將戡定外虞澄清列郡光膺藩屏之寄式崇社稷
之勲對揚休命以永終譽可封汾陽郡王知朔方河中
北庭潞儀沁等州節度行營兼興平定國等兵馬副元
帥仍充本管內觀察處置使餘如故

僕固懷恩朔方節度使制

工部尚書兼御史大夫隴右觀察處置等使大寧郡王
僕固懷恩經武大才濟時良具今以寇窮河洛思用討
除宜輟務於西陲伴廓清於東夏可充朔方行營節度

使餘如故

李抱玉河西等道副元帥制

常袞

勅周以元老監方伯漢以丞相撫四夷則軍國之務中外一體自華陽而西至於隴坂涉河之右兼控五原總三將之師專萬里之寄詰禁經武宜有統制憂邊謀帥深仗輔臣開府儀同三司行兵部尚書同中書門下平章事潞州大都督府長史知鳳翔府事充懷鄭澤潞觀察處置等使仍充南道通和蕃秦隴臨洮已來觀察處

置等使上柱國涼國公李抱王文以經邦德以鎮俗孝
友忠信人倫模表禮樂政刑朝之訓式以道匡朕允升
大猷參聽斷之可否載清靜以寧一兼委戎旅屏於方
夏智謀變化潛合神明將校悅從親如父子事出韜鈴
之外功成戰伐之前勤勞王家以衛社稷有致君庇人之績
冠旂常彝鼎之銘故以國之憑倚久任憂患兵車之半
悉以與之當不憚煩以時鎮定也可兼充山南西道觀
察處置度支營田等使判涼州事隴右懷鄭潞澤等州

使如故充西南西道河西隴右等道副元帥

馬燧渾瑊副元帥同招討河中制 陸贄

勅天地殊位君臣異制苟不率道茲為亂常退而增修
於是有舜干之義諭以遷善於是有文告之辭若猶不
悛乃用致討興戎動衆豈得已哉李懷光擢自軍旅委
之節制亟有勞績累加寵榮總衆駿奔自遠赴難解圍
逐寇朕甚德之位極上台寄宗統帥親之若同體信之
無間言朕於斯人亦已厚矣而器小任重固貽顛覆有

功自棄無過自疑崇信讒邪却逐將帥養寇資亂蓄姦
幸災朕素所推誠尚謂非實優容任過坦然如初凶德
既盈醜跡彌露謀危社稷通結渠魁公相往來無復避
忌窮極凶悖何所不忍朕播遷巴梁遠違陵寢大懼失
墜為列聖羞賴先澤在人兆庶知感朔方將校忠節不
渝懷光既阻姦謀詭稱効順累陳款疏請詣闕庭朕深
惟舊勲務欲全貸授以師傅之任疇其并賦之食璽書
勞問誓以終始懷光遂殺辱使臣完聚守備將以悖慢

之罪加於忠義之軍因茲脅從有異同惡謂衆可罔謂
天可欺覆載所不容人神所共棄討除大慙招輯非辜
爰資輔臣以董戎寄銀青光祿大夫檢校司空平章事
兼太原尹北京留守充河中保寧軍節度觀察處置度
支營田等使北平郡王馬燧操業端亮氣宇弘遠秉難
奪之節負不羈之才恒持至公深識大體感激而三軍
有勇彌綸而庶績克諧威聲所臨郡邑皆服殿於北土
隱若長城元從奉天定難功臣開府儀同三司守侍中

兼靈州大都督府長史充靈鹽豐夏等州節度管內度
支營田觀察處置押蕃部落等使仍充朔方軍邠寧振
武奉天永平等軍行營節度兵馬副元帥上柱國樓煩
郡王渾瑊純粹積中仁厚成性蘊寬大以容衆存誠信
以撫人事必沉詳臨危益辦節惟貞固在險逾彰弘濟
艱難懋昭勤伐出納朕命光膺具瞻並文武全才安危
注意副我憂矚時惟二臣比德協謀往清多難燧可兼
充奉誠軍及晉憲隰等州節度并管內諸軍行營兵馬

副元帥餘並如故城可兼河州尹充河中絳州節度觀
察處置等使仍充河中同絳陝虢等州節度支管内諸
軍行營副元帥功臣開府本官勳封並如故嗚呼朕之
不明不敏失於君道連禍未息勞師靡居中心自咎鬱
若焚灼又以朔土之衆大著忠勞橫遭汙脅深所憫惜
爾其敬敷朕命明諭朕懷務於招綏非黷威武惟輸誠
歸順罔有不赦惟執迷拒順罰止元凶寧失不經無濫
非罪列爵懸賞用俟勳賢布告遠邇咸令知悉

李晟鳳翔隴右節度使兼涇原副元帥制

勅周之元老以分陝為重漢之丞相以憂邊見稱故方
岳克寧疆場不聳安人保泰致理之端今所以重煩上
台作鎮西土奉天定難功臣司徒兼中書令充神策軍
節度京畿渭南渭北商華等州兵馬副元帥京畿渭南
廊坊丹延等州節度觀察處置等使上柱國合川郡王
李晟厲精剛之操秉博厚之德識時變通而大節不奪
虛受廣納而獨斷自明奉法持身論功先下衆無犯命

人用樂從懷德畏威令行禁止誓羣帥於危疑之際駐
孤軍於板蕩之中氣凌風雲誠動天地一鼓而虜徒懾
北再駕而京邑廓清師皆如歸人不知戰載安社稷功
格皇天而明識秉藝清風激俗雅尚恬曠撫謙有光朕
以汧隴近郊扶風右地川阜連亘抵於回中限界諸戎
屏藩王室所屬誠重允付元臣兼二將之甲兵崇十連
之統帥宣威耀德罷警息人俾予仰成時乃之勲可兼
鳳翔尹充鳳翔隴右涇原節度兼管內及四鎮北庭行

營兵馬副元帥改封西平郡王功臣本官兼官勲如故

興元元年

八月四日

劉洽宋亳兵馬都統制

勅論道經邦允歸碩望建牙統衆必藉雄才中外具瞻
安危注意今以二柄付之元臣開府儀同三司檢校尚
書左僕射同中書門下平章事使持節宋州諸軍事兼
宋州刺史充宣武軍節度支度營田宋亳潁等州觀察處
置等使仍權知汴滑宋毫等道都統兵馬事上柱國懷德郡王

劉洽秉志端亮飭躬簡儉博厚足以容衆和易足以長
人純孝榮親盡忠事國分我閭寄殿於大邦扼制淮夷
保鄆楚甸戎捷繼至軍聲載揚殪羣凶於宛丘殛大慙
於梁野控引漕輓委輸京師予嘉乃異勲懋乃貞節用
錫丕命俾揚洪休燮贊三台紀綱羣帥式是大任爾惟
欽哉可檢校司空同中書門下平章事依前充宣武軍
節度度支營田宋亳潁管內兵馬都統散官勳封如故

范希朝京西行營節度使制

古之命將帥修封疆在於整軍非以耀武故繕理亭障
訓齊車徒以申國威以固王畧非誠節茂著無以分統
六師非勲績彰明無以并護諸將副茲重任實在忠賢特
進檢校右僕射兼右金吾衛大將軍充右街使成紀男
范希朝有貞臣之節有良將之風識達武經學綜兵要
臨事能斷好謀而成嘗領元戎鎮於朔野控河上之塞
驅漠南之庭修具政刑諭以威德士吏向慕裔夷綏懷
入覲京師策勲王府洎司做衛禁旅增嚴直道彌彰嘉

庸茂者固可以總統北路節制西陲成魏絳和戎之勲
振晁錯備邊之策俾異俗率化穡人成功師乘以和烽
堠無警懋昭丕績時乃之休可開府儀同三司檢校左
僕射兼右神策京西諸城鎮行營兵馬節度使封如故
貞元

裴度幽鎮兩道招撫使制

門下夫以區區秦伯而猶念晉國曰其君是惡其人何
罪况朕均養億兆為之君親燕人冀人皆吾乳哺而育

之者安忍以豺狼驅脅之故絕其飛走盡納網羅止行
犯命之誅是用開其一面河東節度觀察處置等使金
紫光祿大夫守司空兼門下平章事太原尹北京留守
上柱國晉國公裴度昔者區域之中蜂蟻巢聚蔡有逆
孽齊有校童厥初圖征疑議滿野不懼不惑挺然披攘
苟無司南允罔能濟佑我憲考為唐神宗實賴股肱運
用心力肆予小子蒙受景靈冀服於前燕平於後而撫
馭失理盤牙復生求思弭寧中夕有得國老尚在夫何

患焉是用亟宣懇惻之誠就加撫招之命於戲頃者師
道元濟乘累代襲授之資藉山東結連之勢以丞相布
畫於千里之外使諸將持重於四封之中而猶劉悟裂
虵豕之軀李祐潰鯨鯢之腹蓋逆順之情異而忠孝之
道明也况彼幽鎮無名狂暴以丞相近觀其宜以諸將
齊奮其力斧鑕之刑坐迫椒蘭之氣外董誰不自愛其
生焉能與亂同死度宜開懷緩帶以待其歸可依前守
司空兼門下侍郎平章事河東節度使充幽鎮兩道招

撫使餘如故

裴度鎮州四面招討使制

元稹

門下傳云死者不可復生刑者不可復屬是以先王斬一支指
殺一犬彘莫不伏念隱悼至於由時決而行之蓋不得已也予
於鎮人亦既伏念俟其後革詎止旬時乃命相臣招懷
撫諭矜其誑誤示以生門期於盡脫網羅豈可驅之陷
阱而豺狼當道荆棘牽衣雖欲歸於有仁厥路無由而
至况王師歷境義勇爭先朕每抑其鋒銳未忍覆其巢

穴是猶愛狼莠而傷稼穡養癰疽以潰肌膚獨懷兒女
之仁慮失祖宗之典今上台居鎮筭畫無遺操晉陽之
利兵驅渥產之良馬舉河東義武之衆合滄景澤路之
師當元異受命之初乘田布雪寃之憤舉毛拾芥其易
可知兼用威恩尚存招致宜令河東節度使裴度充鎮
州四面招討使於戲以一城之卒敵天下之師徇猖狂
之徒抗君父之命我哀爾輩死實無名苟能自新亦冀
容汝主者施行

唐大詔令集卷五十九